

四庫全書

集部

欽定四庫全書

集部

坡門酬唱集卷一至

詳校官中書

臣張經田

助教

臣

常循覆勘

總校官庶吉士

臣朱

鈐

校對官中書

臣

李 霖

謄錄監生

臣

李文杞

欽定四庫全書

集部八

坡門酬唱集

總集類

提要

臣等謹案坡門酬唱集二十三卷宋邵浩編
浩字叔義金華人書前有張叔椿序云歲己
酉竭耒豫章機幕邵君實隆興同升出示巨
編目曰坡門酬唱總成六百六十篇命工鈔
本以廣其傳末題紹興元年五月二十四日

又有浩自作引云紹興戊寅浩年未冠肄業
成均隆興癸未始得第以歸因取兩蘇公兄
唱弟和及門下六君子平日屬和兩公之詩
撫而錄之曰蘇門酬唱淳熙己酉浩官豫章
臨江謝公自中丞遷尚書均逸未歸為之作
序且更曰坡門酬唱末題紹興庚戌四月一
日考癸未為孝宗隆興元年己酉為淳熙十
六年上距高宗紹興元年辛亥已五十九年

且庚戌為建炎四年亦不得題紹興二序紀
年顯然有誤案淳熙己酉孝宗內禪次年庚
戌即光宗紹熙元年則序內紹興必紹熙之
訛特据浩引所言叔椿序當先成乃浩引題
四月而叔椿序反題五月亦為舛錯未合殆
傳寫既久或經後人所妄改也其書專錄蘇
軾蘇轍兄弟及黃庭堅秦觀晁補之張耒陳
師道李廌等平日酬唱和答之作前十六卷

皆軾詩而轍及諸人和之者次轍詩四卷黃庭堅等詩三卷亦錄軾及諸人和作李廌闕焉其不在八人之數而別有繼和者亦皆附入為注以別之其詩大抵本集所已有又如山谷外集所載次韻子瞻書黃庭經經尾付蹇道士詩次韻晁補之廖正一贈荅詩補之又有和子瞻種松贈杜興秀才三首今坡集載坡詩止二首而此集均未編入亦不能無

所掛漏然次韻之詩惟東坡變化不窮稱為
獨絕而諸家才力頗亦足以相抗浩更彙而
合之使讀者叅比互証得以稍窺用意之所
在於詩學亦不為無補焉乾隆四十五年三
月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

增補西明集
提要

坡門酬唱集原序

詩人酬唱盛於元祐間自魯直後山宗主二蘇旁與秦少游晁无咎張文潛李方叔馳騁相先後萃一時名流悉出蘇公門下嘻其盛歟余少喜學詩嘗泛觀衆作因之汴流尋源竊恨坡公詩有唱而無和或和而不知其唱每開卷雖凝思遐想茫無依據至蒐取他集纔互見一二復恨不獲覩其全也將類聚俾成一家輒局於官守且未暇歲在己酉竭來豫章機幕邵君叔義實隆興

同升出示巨編目曰坡門酬唱迺蘇文忠公與其弟黃門偕魯直而下六君子者迭為往復摠成六百六十篇幸矣余之嗜鄉偶與叔義同而精敏不逮遠矣夫以數十年玩味之餘與欲為而未即遂者一旦欣快所遇若可矜而振之也烏知無復有同志者興不可得見之嘆遂命工鋟木以廣其傳紹興元年五月二十四日永嘉張叔椿書於觀風堂

坡門酬唱集引

紹興戊寅浩年未冠乃何幸得肄業於成均朝齋暮監
知有科舉計耳古文詩章未暇也隆興癸未始得第以
歸有以詩篇來求和者則藐不知所向於是取兩蘇公
之詩讀之因得竊窺兩公少年時交遊未甚廣往往自
為師友兄唱則弟和弟作則兄酬用事趣韻莫不字字
穩律或隱去題目讀之則不知其孰為唱孰為酬蓋無
纖毫斧鑿痕迹其妙如此浩心焉好之為之諷誦諦繹

至忘寢食者幾年始僅能與人相應和為韻語既又念
兩公之門下士黃魯直秦少游晁無咎張文潛陳無已
李方叔所謂六君子者凡其片言隻字既皆足以名世
則其平日屬和兩公之詩與其自為徃復決非偶然者
因盡撫而錄之曰蘇門酬唱獨恨方叔有酬無唱蓋其
晚出相與遊從之日淺也無事展卷則兩公六君子之
怡怡僛僛宛然氣象在目神交意徃直若與之承歡接
辭於元祐盛際豈特為廣和助耶淳熙己酉浩官於豫

章臨江謝公自中丞遷尚書均逸未歸浩出此編公甚
喜甚為作序且曰謂之蘇門酬唱則兩公並立不如俾
老仙專之更曰坡門酬唱何如浩曰唯唯紹興庚戌四
月一日金華邵浩引

欽定四庫全書

坡門酬唱集卷一

東坡

宋 邵浩 編

壬寅二月有詔令郡吏分往屬縣減決囚禁自十
三日受命出府至寶雞號郿蓋屋四縣既畢事
因朝謁太平宮而宿於南溪溪堂遂並南山而
西至棲觀大秦寺延生觀仙遊潭十九日迴歸

作詩五百言以記凡所經歷者寄子由

遠人罹水旱王命釋俘囚分縣傳明詔循山得勝遊蕭
條初出郭曠蕩實消憂薄暮來孤鎮登臨憶武侯崢嶸
依絕壁蒼茫瞰奔流半夜人呼急橫空火氣浮天遙殊
不辨風急已難收曉入陳倉縣猶餘賣酒樓煙煤已狼

籍吏卒尚呀咻

十三日宿武城鎮即俗所謂石鼻寨也孔明所築是夜二鼓寢雞火作相去三

十里而見於武城

雞嶺雲霞古龍宮殿宇幽

縣有雞爪峯龍宮寺

南山連

大散歸路走

音奏

吾州欲往安能遂將還為少留回趨西

號道却渡小河洲聞道磻溪石猶存渭水頭蒼崖雖有

迹大釣本無鈎

十四日自寶雞行至號聞太公磻溪石在縣東南十八里猶有投竿跪餌兩膝

所著之處

東去過郿塢孤城象漢劉誰言董公健竟復伍孚

讎白刃俄生肘黃金漫似丘

十五日至郿縣有董卓城象長安俗謂之小長安

平生聞太白一見駐行騶鼓角誰能試風雷果致不巖

崖已竒絕冰雪更凋鏤春旱憂無麥山靈喜有湫蛟龍

懶方睡鉗罐小容偷

是日晚自郿起至青秋鎮宿道過太白山相傳云軍行鳴鼓角過山

下輒致雷雨山中有湫甚靈以今歲旱方議取之

二曲林泉勝三川氣象侔近

山薺麥早臨水竹篁脩

十六日至盤座以近山地美氣候殊早縣有官竹園十數里不

絕

先帝膺符命行宮畫冕旒侍臣簪武弁女樂抱瑩篴

秘殿開金鎖神人控玉蚪黑衣橫巨劍被髮凜雙眸

十七

日寒食自盤座東南行二十餘里朝謁太平宮二聖御容此宮乃太宗皇帝時有神降于此道士張守真以告

受命之符所為立也神封翊聖將軍有殿

邂逅逢佳士相將弄綵舟投篙披

綠苻濯足亂清溝晚宿南溪上森如水國秋遶湖栽翠

密終夜響颼颼

是日與監宮張杲之泛舟南溪遂宿於溪堂

冒曉窮幽邃操

戈畏炳彪

十八日循終南而西縣尉以甲卒見送或云近官竹園往往有虎

尹生猶有

宅老氏舊停輶問道遺蹤在登仙往事悠馭風歸汗漫
閱世似蜉蝣羽客知人意瑤琴繫馬鞦不辭山寺遠來
作鹿鳴呦帝子傳聞李巖堂髣髴像緱輕風幃幔卷落日

髣髴愁入谷

音浴

驚蒙密登坡費挽摟亂峰巉似槩一水

淡如油中使何年到金龍自古投千重橫翠石百丈見
游鯨最愛泉鳴洞初嘗雪入喉滿餅雖可致洗耳嘆無

由

是日遊崇聖觀俗所謂樓觀也乃尹喜舊宅山脚有
授經臺尚在遂與張果之同至大秦寺早食而別有

太平宮道士趙宗有抱琴見送至寺作鹿鳴之引乃去
又西至進生觀觀後上小山有唐玉真公主修道之遺

迹下山而西行十數里南入黑水谷谷有潭名仙遊潭
上有寺三倚峻峯面清溪樹林深翠怪石不可勝數潭
水以繩絙石數百尺不得其底以瓦礫投之翔揚徐下
食頃乃不見其清澈如此遂宿於中興寺寺中有玉女
洞洞中有飛泉甚甘明日以泉
二瓶歸至郿又明日乃至府
忽憶尋蟆培方冬脫鹿

裘山川良甚似水石亦堪儔惟有泉旁飲無人自獻酬

昔與子由遊蟆培時方
冬洞中溫溫如二三月

樂城次韻

山川足清曠闌闌巧拘囚安得嬾阿御同為穆滿遊遙
知因渙汗遠出散幽憂原隰繁分繡村虛盡小侯春深

秦樹綠野濶渭河流四顧神蕭瑟前探意漲浮勝觀殊
未已往足詎能收下坂如浮舸登崖劇上樓強行腰偃
僂困坐氣噓咻鳥語林巒靜花明澗谷幽濯溪驚野老
伐路駭它州中散探深去文淵到處留聽琴峰下寺弄
石水中洲溪冷泉冰脚山高霧遶頭石潭清照骨瀑水
濺成鈎仙廟鳴鐘磬神官秉鉞劉養生聞帝女服氣絕
彭讎故宅猶傳尹先師不喜丘居人那識道過客漫停
騶巖谷誠深絕神仙信有不雲居無几杖霞佩棄鐫鏤

豹隱連山霧龍潛百尺湫門開誰與叩桃熟浪傳偷紺
髮清無比方瞳凜不侔會須林下見乞取壽年脩拔去
和雞犬相隨若旆旒乘風遺騷裊長嘯賤笙篴從騎衣
皆羽前驅鬣盡蚪安能牽兩足暫得快雙眸自昔辭鄉
樹南行上楚舟萬江窮地脈三峽束天溝雲暗鄴都晚
波吹木樨秋尋溪緣窈窕入洞聽颼颼空寺收黃粟荒
祠畫伏彪登臨雖永日行邁肯停輶蓄縮今何事攀躋
昔已悠魏京饒士女春服聚蜉蝣雷動車爭陌花搖樹

繫鞦遊人紛蕩漾野鳥自嚶呦平日曾經洛閒居願卜
緇空言真比夢久渴漸成愁早退嘗相約辭囂痛自摻
愛山心劫劫從宦興油油海宇都無礙山林盡可投願
為雲上鵠莫作盎中鯀適性行隨足謀生富給喉今遊
雖不與後會豈無由畫出同穿屐宵眠共覆裘弟兄真
欲爾朋友定誰儔試寫長篇調何人肯見酬

太白山下早行至橫渠鎮書崇壽院壁

馬上續殘夢不知朝日昇亂山橫翠幃落月淡孤燈奔

走煩郵吏安閒愧老僧再再遊應眷眷聊亦記吾曾

樂城次韻

山下晨光晚林梢露滴昇峰頭斜見月野市早明燈樹
暗猶藏鵲堂開已饌僧據鞍應夢我聯騎昔嘗曾

留題延生觀後山上小堂

溪山愈好意無厭上到巉巉第幾尖深谷野禽毛羽怪
上方仙子鬢眉纖不慙弄玉騎丹鳳應逐嫦娥駕老蟾
澗草巖花自無主晚來蝴蝶入疎簾

樂城次韻

謝公遊意未能厭踏盡登山屐齒尖古殿神仙深杳杳
香爐烟翠起纖纖巖花寂歷飄瓊片庭檜蕭疎漏玉蟾

帝子莫歸人不見微風細雨自開簾

唐王真公主
修道于此山

留題仙遊潭中興寺寺東有玉女洞洞南有馬融
讀書石室過潭而南山石益奇潭上有橋畏其
險不敢渡

清潭百丈皎無泥山木陰陰谷鳥啼蜀客曾遊明月峽

秦人今在武陵溪獨攀書室窺巖竇還訪仙妹款石闥
猶有愛山心未至不將雙脚踏飛梯

樂城次韻

潭邊沙水不成泥潭上孤禽掛嶮啼繚繞飛橋能試客
蒙茸翠蔓巧藏溪雲為絳帳馬融室石作屏風玉女閨
仙果知君今未足臨潭脚戰怕長梯

九月二十日微雪懷子由弟二首

岐陽九月天微雪已作蕭條歲暮心短日送寒砧杵急

冷官無事屋廬深
愁腸別後能消酒
白髮秋來已上簪
近買貂裘堪出塞
忽思來傳問西琛

江上同舟詩滿篋
鄭西分馬涕垂膺
未成報國慙書劍
豈不懷歸畏友朋
官舍度秋驚歲晚
寺樓見雪與誰登
遙知讀易東窓下
車馬敲門定不應

樂城次韻

秋氣蕭騷仍見雪
客愁繚繞動縈心
幽吟北戶窓聲細
歸夢函關馬跡深
疎樹飛花輕款款
衰荷留柄亂簪簪

遙聞詩酒皆推勝
社客何人近納琛

平時出處常聯袂
文翰叨陪舊服膺
自信老兄憐弱弟
豈關天下少良朋
何時杯酒看浮白
清夜看蔬粗滿登
離思隔年詩不盡
秦梁雖遠速須膺

病中聞子由得告不赴商州三首

病中聞汝免來商旅
鴈何時更著行遠
別不知官爵好
思歸苦覺歲年長
著書多暇真良計
從宦無功謾去鄉
惟有王城最堪隱
萬人如海一身藏

近從章子聞渠說苦道商人望汝來說客有靈慚直道
逋翁久沒厭凡才夷音僅可通名姓癭俗無由辨頸顚
答策不堪宜落此上書求免亦何哉章子厚
惇也
辭官不出意誰知敢向清時怨位卑萬事悠悠付杯酒
流年冉冉入霜髭策曾忤世人嫌汝易可忘憂家有師
此外知心更誰是夢魂相覓苦參差

樂城次韻

怪我辭官免入商才疎深畏泰周行學從社稷非源本

近讀詩書識短長東舍久居如舊宅春蔬新種似吾鄉

閉門已學龜頭縮避謗仍兼雉尾藏

雉藏不能盡尾鄉人以爲謗

南商西洛曾虛署長吏居民怪不來妄語自知當見棄
遠人未信本非才厭從貧李嘲東閣懶學諛張緩兩腮
知有四翁遺跡在山中豈信少人哉

塤動箎鳴只自知憂輕責少幸官卑聲名謾作耳中瑱
科第空收額底髭西鄙猖狂猶將將中朝閒暇自師師
近成新論無人語仰羨飛鴻兩翅差

病中大雪數日未嘗起觀號令趙薦以詩相屬戲
用其韻答之

經旬臥齋閣終日親劑和去聲不知雪已深但覺寒無奈

一作飄蕭窓紙鳴堆壓簷板墮關中皆以板為簷風颭助凝冽

幃幔困掀簸惟思近醇醲未敢窺璨瑳何時反炎赫却
欲躬白磨誰云座無氈尚有裘充貨西鄰歌吹發促席
寒威挫崩騰踏成逕繚繞飛入坐人歡瓦先融飲雋餅
屢臥嗟余獨愁寂空室自困坷欲為後日賞恐被遊塵

卷一
浣寒更報新霽皎月懸半破有客獨苦吟清夜默自課
詩人例窮蹇秀句出寒餓何當暴雪霜庶以躡郊賀

樂城次韻

吾兄筆鋒雄詩俊不可和雪中思清絕韻惡愈難奈慙
懃賦黃竹自勸飲白墮言隨飛花落意與長風簸餘力
遠見撩千里寄璀璨嗟余學久廢有類轉空磨研磨久
無得安可待充貨空記乘峽船行意被摧挫溟濛覆洲
渚冷冽光照坐我唱君實酬馳騁不遑臥譬如逐獸盧

豈覺山邇河酒有助喧熱筆硯盡霑浣詩詞禁推類令
肅安敢破亦有同行人牽挽赴程課爾來隔秦魏渴望
等飢餓徒然遇佳雪有酒誰與賀

歲晚相與餽問為餽歲酒食相邀呼為別歲至除
夜達旦不眠為守歲蜀之風俗如是余官於岐
下歲暮思歸而不可得故為此三詩寄子由弟

餽歲

農功各已收歲事得相佐為歡恐無及假物不論貨山

川隨出產貧富稱小大
寘盤巨鯉橫發籠上聲雙兔臥富
人事華靡綵繡光翻座
貧者愧不能微摯出春磨
官居故人少里巷佳節過
亦欲舉鄉風獨唱無人和

守歲

故人適千里臨別尚遲遲
人行猶可復歲行那可追
問歲安所之遠在天一涯
已逐東流水赴海歸無時
東鄰酒初熟西舍羶亦肥
且為一日歡慰此窮年悲
勿嗟舊歲別行與新歲辭
去去勿回顧還君老與衰

別歲

欲知垂盡歲有似赴壑蛇脩鱗半已沒去意誰能遮况
欲繫其尾雖勤知奈何兒童強不睡相守夜謹譁晨雞
且勿唱更鼓畏添撾坐久燈燼落起看北斗斜明年豈
無年心事恐蹉跎努力盡今夕少年猶可誇

樂城次韻

餽歲

周公制鄉禮無有相通佐鼎肉送子思蒸豚出陽貨交

親隨高低豈問小與大自從此禮衰伏臘有飢臥鄉人
慕古俗酬酢等四座東鄰遺西舍迭出如蟻磨寧我不
飲食無爾相咎過相從慶新春顏色買愉和

別歲

富貴日月速貧賤覺歲遲遲速不須問俱作不可追親
舊且酣飲送爾天北涯歲歲雖無情從我歷四時酌爾
一盃酒留我壯且肥長作今歲歡勿起異日悲掉頭不
肯顧曾莫與我辭酒闌氣方橫豈信從爾衰

守歲

於菟絕繩去顧兔追龍蛇

是歲壬寅

奔走十二蟲羅網不及

遮嗟我地上人豈復奈爾何未去不自閑將去乃諠譁
天上驅獸官為君肯停撾魯陽揮長戈日車果再斜灑
酒勸爾醉期爾暫蹉跎偕醉遣爾去壽考自足誇

和劉長安題薛周逸老亭周最善飲酒未七十而
致仕

近聞薛公子早退驚常流買園招野鶴鑿井動潛虬自

言酒中趣一斗勝涼州翻然拂衣去親愛挽不留隱居
亦何樂素志庶可求所亡嗟無幾所得不啻酬青春為
君好白日為君悠山鳥奏琴筑野花弄閒幽雖辭功與
名其樂實素侯至今清夜夢尚驚冠壓頭誰能載美酒
往以大白浮之子雖不識因公可與遊

樂城次韻

飛鳥不知穴山鹿不知流薛子善飲酒口如吸水虬吾
觀腸胃間何異族黨州人滿地已盡一介不可留謂子

試飲水一酌不再求謂予飲醇酒百醕豈待酬酒可水
不可其說亦已悠以我視夫子胸腹百丈幽譬如田中
人視彼公與侯未省破顏飲何況裸露頭鵠夷謂大瓠
皆飽安用浮多少苟自適豈害為朋遊

坡門酬唱集卷一

欽定四庫全書

坡門酬唱集卷二

宋 邵浩 編

東坡

中隱堂詩

并序

岐山宰王君紳其祖故蜀人也避亂來長安而遂
家焉其居第園圃有名長安城中號中隱堂者是
也予之長安王君以書戒其子弟邀予遊且乞詩

甚勤因為作此五篇

前地理志京兆尹縣十二
其一曰長安高帝五年置

去蜀初逃難遊秦遂不歸園荒喬木老堂在昔人非鑿
石清泉激開門野鶴飛退居吾久念長恐此心違

徑轉如脩蟒坡垂似伏鼇樹從何代有人與此堂高好

古嗟生晚偷閒厭久勞王孫早歸隱塵土汙

同君袍

二月驚梅晚幽香此地無依依慰遠客皎皎似吳姝不
恨故園隔空嗟芳歲徂春深桃李亂笑汝並羈孤

翠石如鸚鵡何年別海壖貢隨南使速載壓渭舟偏已

伴喬松老那知故國遷金人解辭漢汝獨不潛然
都城更幾姓到處有殘碑古隧埋蚪蚪奔崖露伏龜安
排壯亭榭收拾費金貲岫嶠何須到韓公浪自悲

樂城次韻

秦中勝三

一作岷

蜀故國不須歸甲第春風滿巴山畫夢

非竹深啼鳥亂花落晚蜂飛我欲西還去敲門謹勿違

唐朝卿相宅此外更應無請看庭前樹曾攀屋裏蛛流
傳漸失實遺老不禁徂試問歸登物林間翠石孤

或云此即

歸登宅

愛君高堂上有似蜀江孺牆外終南近簷西太白偏晚
梅尋自媚老竹暗相遷未到遙聞說吾廬安得然

官去空留鶴山浮不見鼇竹林迎日靜槐木擁亭高烏
噪知人至蟬鳴覺口勞誰能飲堂上解帶不穿袍

君看原上墓墳盡但餘碑誰見生前貴塵生帶下龜高
堂幸有酒一飲豈論貴勉強行樂耳古人良可悲

是日自磻溪將往陽平憩於麻田青峰寺之下院

翠麓亭

不到峰前寺空來渭上村此亭聊可喜脩徑豈辭捫谷
映朱欄秀山含古木尊路窮驚石斷林缺見河奔馬困
嘶青草僧留薦晚飧我來秋日午旱久石牀溫安得雲
如蓋能令雨瀉盆共看山下稻涼葉晚翻翻

樂城用韻

走馬紅塵合開懷野寺存南山抱村轉渭水帶沙渾亭
峻朱欄繞堂虛白佛尊煩襟喜脩竹勸馬樂芳蓀白疊

柔隨手清泉滿照盆塵顏洗濯淨髀肉再三捫饋食青
蔬軟流匙細粟翻老僧勿施敬對客說山門

二十七日自陽平至斜谷宿於南山中蟠龍寺

橫槎晚渡碧澗口騎馬夜入南山谷

音浴

谷中暗水響龍

瀧嶺上疎星明煜煜寺藏巖底千萬仞路轉山腰三百
曲風生飢虎嘯空林月黑驚麕竄脩竹入門突兀見深
殿照佛青瑩有殘燭愧無酒食待遊人旋斫杉松煮溪
菽板閣獨眠驚旅枕木魚曉動隨僧粥起觀萬瓦鬱參

差目亂千巖散紅綠門前商賈負椒薺山後咫尺連巴
蜀何時歸耕江上田一夜心逐南飛鵠

樂城用韻

谷中夜行不見月上下不辨山與谷前呼後應行相從
山頭誰家有遺燭楚楚深徑馬蹄響落落稀星著疎木
行投野寺僧已眠叩門無人狗出縮號呼從者久嗔罵
老僧下床揉兩目問知官吏冒夜來掃牀延客臥華屋
釜中無羹甑實盡愧客滿盎惟脫粟客來已遠睡忘覺

僧起開堂勸晨粥自嗟奔走閑僧閒偶然來過何年復
留詩滿壁待重遊但恐塵埃難再續

周公廟廟在岐山西北七八里廟後百許步有泉
依山湧冽異常國史所謂潤德泉世亂則竭者
也

吾今那復夢周公尚喜秋來過故宮翠鳳舊依山碑兀
清泉長與世窮通至今遊客傷離黍故國諸生詠雨濛
牛酒不來烏鳥散白楊無數暮號風

樂城次韻

周人尚記有周公
禾黍離離下有宮
破豆蒸豚非以報
野巫長跪若為通
山圍棟宇泉流近
廟後有潤德泉世亂則竭
鳳去梧桐落葉濛
有客賦詩題屋壁
二南猶自有遺風

南溪之南竹林中新構一茅堂
予以其所處最為深邃故名之避世堂

猶恨溪堂淺更穿
脩竹林高人不畏虎
避世已無心
隱几頗如病
忘言兀似瘖
茅茨追上古冠蓋
謝當今曉夢

猿呼覺秋懷鳥伴吟暫來聊解帶屢去欲攜衾湖上行
人絕堦前暮雪深應逢綠毛叟扣戶夜抽簪

樂城次韻

拄杖行窮徑圓堂尚有林飛禽不驚處萬竹正當心虎
嘯風吹籟霜多蟬病瘖獸驕從不避人到記由今未暇
終身住聊為半日吟青松可絕食黃葉不須衾偶到初
迷路將還始覺深堂中有幽士插髻尚餘簪

自清平鎮遊樓觀五郡大秦延生仙遊往返四日

得十一詩寄舍弟子由同作

樓觀

尹喜舊宅

鳥噪猿呼晝閉門寂寥誰識古皇尊青牛久已辭轅軛
白鶴時來訪子孫山近朔風吹積雪天寒落日淡孤村
道人應怪遊人衆汲盡堦前井水渾

樂城次韻

神仙避世守關門一世沈埋百世尊舊宅居人無姓尹
深山道士即為孫天寒遊客常逢雪日暮歸鴉自識村

君欲留身託幽寂直將山外比羌渾

五郡

古觀正依林麓斷居民來就水泉甘亂谿赴渭爭趨北
飛鳥迎山不復南羽客衣冠朝上象野人香火祝春蠶
汝師豈解言符命山鬼何知託老聃

觀有明皇碑言夢老子告以享國長

久之
意

樂城次韻

蜀人不信秦川好食蔗從梢未及甘當道沙塵類河北

依山水竹似江南觀形隨阜飲溪鹿雲氣侵山食葉蠶
猶有道人迎客笑白鬚黃袖豈非聃

南溪有會景亭處衆亭之間無所見甚不稱其名
余欲遷之少西臨斷岸西嚮可以遠望而力未
暇特為製名曰招隱仍為詩以告來者庶幾遷
之

飛簷臨古道高榜勸遊人未即令公隱聊須濯路塵茅
茨分聚落煙火傍城闌林缺湖光滿窓明野意新居民

惟白帽過客謾朱輪山好留歸屐風迴落醉巾他年誰
改築舊制不須因再到吾雖老猶堪作坐賓

樂城次韻

隱居吾未暇何暇勸夫人試飲此亭酒自慙纓上塵林
深開翠帟岸斷峻嚴闔送雪村醅釀迎陽鳥哢新竹風
吹斷籟湖月轉車輪霜葉飛投坐山梅重壓巾欲居常
有待已失嘆無因古語君看取聲名本實賓

凌虛臺

在鳳翔縣之後園陳
希亮知鳳翔日建也

才高多感激道直無往還不如臺上舉酒邀青山青
山雖云遠似亦識公顏崩騰赴幽賞披豁露天慳落日
銜翠壁暮雲點煙鬟浩歌清興發放意未禮剛是時歲
云暮微雪灑袍斑吏退迹如埽賓來踴一作勇躋攀臺前
飛鴈過臺上雕弓彎聯翩向空墜一笑驚塵闌

樂城次韻

棄我謂我遠求我謂我還我一爾則二視此臺上山山
高上千天獨不照我顏無乃我自蔽誰謂山則慳遠望

不見趾近視不得鬟山實未始變任子自擇刪北風吹
南崖山上秋葉斑道遠又寒苦皴裂辭難攀晴空卷朝
雲照夜霜月彎強爾登此臺免爾超關闌

扶風太守宅
舊不見南山

惟此臺上
見之故云

竹飀

王注竹飀食
竹根之鼠也

野人獻竹飀腰腹大如盎自言道旁得採不費置網鷗
夷讓圓滑混沌慙瘦爽兩牙雖有餘四足僅能髣逢人
自驚蹶悶若兒脫襁念茲微陋質刀几安足枉就禽太

倉卒羞愧不能饗南山有孤熊擇獸行舐掌

樂城次韻

野食不穿囷谿飲不盜盎嗟飢獨何罪膏血自為罔陰
陽造百物偏此愚不爽肥瘠與瘦黠稟受不相髣王孫
處深谷小若兒在襁超騰避彈射將中還復枉一朝受
羈縲冠帶相賓饗愚死智亦擒臨食抵吾掌

漢陂魚

陂在
鄆縣

霜筠細破為雙掩中有長魚如臥劍紫荇穿顯氣慘淒

紅鱗照坐光磨閃攜來雖遠鬣尚動烹不待熟指先染
坐客相看為解顏香粳飽送如填塹早歲嘗為荆渚客
黃魚屢食沙頭店濱江易採不復珍盈尺輒棄無乃僭
自從西征復何有欲致南烹嗟久欠游儵瑣細空自腥
亂骨縱橫動遭砭故人遠餽何以報客俎久空驚忽贍
東道無辭信使頻西鄰幸有庖藿醢

樂城次韻

漢陂霜落魚可掩枯茨破盤蒲折劍巨斧敲冰已暗知

長叉刺浪那容閃鯨孫蛟子誰復惜朱鬣金鱗漫如染
邂逅相遭已失津偶然一掉猶思塹嗟君遊宦久羊炙
有似遠行安野店得魚未熟口流涎豈有哀矜自欺僭
人生飽足百事已美味那令一朝欠少年勿笑貪已筋
老病行看費鍼砭羊生懸骨空自飢伯夷食菜有不贍
清名驚世不益身何異飲醯徒醢醢

十二月十四日夜微雪明日早往南溪小酌至晚
南溪得雪真無價走馬來看及未消獨自披榛尋履迹

金史卷之八
最先犯曉過朱橋誰憐屋破眠無處坐覺村飢語不囁
惟有暮鴉知客意驚飛千片落寒條

樂城次韻

南谿夜雪曉來霽有客晨遊酒未消風泛餘花來逐馬
光浮斷澗不知橋山寒凍合行人息醉熟賓歡舞意囂
歸騎相將踏瑤玉嗅林閒認早梅條

潁州初別子由二首

熙寧四年十月東坡赴杭州
通判子由送至潁州相別

征帆掛西風別淚滴清潁留連知無益惜此須臾景我

生三度別此別尤酸冷念子似先君木訥剛且靜寡詞
真吉人介石乃機警至今天下士去莫如子猛嗟我久
病狂意行無坎井有如醉且墜幸未傷輒醒從今得閒
暇默坐消日永作詩解子憂持用日三省

近別不改容遠別涕沾胃咫尺不相見實與千里同人
生無離別誰知恩愛重始我來宛丘牽衣舞兒童便知
有此恨留我過秋風秋風亦已過別恨終無窮問我何
年歸我言歲在東離合既循環憂喜迭相攻悟此長太

息我生如飛蓬多憂髮早白不見六一翁

樂城次韻

託身遊宦鄉終老羨箕顙隱居亦何樂親愛形隨影念
兄適吳越霜降水初冷翩然事舟楫棄此室廬靜平明
知當發中夜抱虛警永懷江上宅歸計失不猛人生殉
所役有若魚墮井遠行豈易還劇飲終難醒不如早自
乞閒日庶猶永世事非所憂多憂亦誰省

放舟清淮上蕩潏洗心胃所遇日轉勝恨我不得同江

淮忽中斷陂隄何重重紫蠓三寸筐白鳧五尺童赤鯉
寒在汕紅粳滿霜風西成百物賤加食慰貧窮胡為復
相念未肯安南東人生免飢寒不受外物攻不見田野
人四壁編茅蓬有食輒自樂誰知富家翁

出潁口初見淮山是日至壽州

我行日夜向江海楓葉蘆花秋興長平淮忽迷天遠近
青山久與船低昂壽州已見白石塔短棹未轉黃茅岡
波平風軟望不到故人久立煙蒼茫

樂城次韻

清淮此日見滄浪始覺南來道路長
窓轉山光時隱見船知水力故軒昂
白魚受釣收寒玉紅稻堆場列遠岡
波浪連天東近海乘桴直恐漸茫茫

壽州李定少卿出餞城東龍潭上

山鷗噪處古靈湫亂沫浮涎遶客舟
未暇燃犀照竒鬼欲將燒燕出潛蚪
使君惜別催歌管村巷驚呼聚攫猴
此地他年頌遺愛觀魚并記老莊周

樂城次韻

東行取次閱三州擊鼓清晨復解舟
車騎紛紜追過客
歌鐘淒咽動潛蚪宦遊底處非巢燕
歸計何嫌誚沐猴
賴有故人憐速過慙慙屢勸酒行周

坡門酬唱集卷二

欽定四庫全書

坡門酬唱集卷三

宋 邵浩 編

東坡

發洪澤中途遇大風復還

風浪忽如此我行欲安歸掛帆却西邁此計未為非洪澤三十里安流去如飛居民見我還勞問亦依依攜酒就船賣此意厚莫違醒來夜已半岸木聲向微明日淮

陰市白魚能許肥我行無南北適意乃所祈何勞弄澎湃終夜搖窓扉妻孥莫憂色更典篋中衣

樂城次韻

昨夜宿洪澤再來遂如歸却行雖云拙乘險諒亦非誰言淮陰近阻此駭浪飛長風徑千里蛟蜃相因依眇然恃一葉此勢安可違冒涉彼何人勇決生慮微欲速有不達魚腹豈足肥風帆尚可轉野廟誰能祈但當擁衾睡謹閉窓與扉夜聞聲尚惡起視聊披衣

十月十六日記所見

風高月暗雲水黃淮陰夜發朝山陽山陽曉霧如細雨
炯炯初日寒無光雲收霧捲已亭午有風北來寒欲僵
忽驚飛電穿戶牖迅駛不復容遮防市人顛沛百賈亂
疾雷一聲如頽墻使君來呼晚置酒坐定已復日照廊
恍疑所見皆夢寐百種變怪旋消亡共言蛟龍厭舊穴
魚鼈隨徙空陂塘愚儒無知守章句論說黑白推何祥
惟有主人言可用天寒欲雪飲此觴

樂城次韻

君不見天高后土黃變化出入惟陰陽旋凝細霧作飛
電復遣震雷追日光可憐萬物甚微細坐聽百變隨顛
僵深根固蒂無計遯倏來忽返安能防平生未見實驚
耳稍遠不知如隔牆君看歌舞醉華屋下有累紮排兩
廊眼前苦樂尚懸絕空中造化知有亡我居宛丘厭凝
沍雪翻海水填陂塘但知膏澤利牟麥恣食餅餌真嘉
祥山陽所記亦何事有酒胡不盡一觴

廣陵會三同舍各以其字為韻仍邀同賦

劉貢父

去年送劉郎醉語已驚衆如今各漂泊筆硯誰能弄我
命不在天羿彀未必中作詩聊遣意老大慵譏諷夫子
少年時雄辨輕子貢爾來再傷弓戢翼念前痛廣陵三
日飲相對恍如夢況逢賢主人白酒撥春甕竹西已揮
手灣口猶屢送羨子去安閒吾邦正喧闐

孫巨源

三年客京輦憔悴難具論揮汗紅塵中但隨馬蹄翻人
情貴往返不報生禍根坐令平生友終歲不及門南來
實清曠但恨無與言不謂廣陵城得逢劉與孫異趣不
兩立譬如王孫猿吾儕久相聚恐見疑排根我褊類中
散子通真巨源絕交固未敢且復東南奔

劉莘老

江陵昔相遇幕府稱上賓再見明光宮戎冠揖搢紳如
今三見子坎坷為逐臣朝遊雲霄間欲分丞相茵莫落

江湖上遂與屈子鄰了不見喜愠子豈真可人邂逅成一歡醉語出天真士方在田里自比渭與莘出試乃大謬芻狗難重陳歲晚多霜霧歸耕當及晨

樂城次韻

劉貢父

貢甫少多才交遊一何衆談詞坐傾倒玉麈日揮弄逡巡不為虐巧捷有微中羣情忌超邁微過出嘲諷南遷時已久未見肯力貢舌在終自竒髀滿定足痛人生百

年內僅比一朝夢駿駿就消涸斗水傾漏甕江淮未可
嫌遲晚聊自送試觀終日閒何似兩耳閑

孫巨源

巨源學縱橫世事夙討論著書十萬字辨如白波翻諫
垣適多事憂心生病根立談信無補閉口出國門棄置
臥江海閔嘿寧復言朝行共長嘆逐客繼二孫

謂莘老
巨源

南方固鄉黨謫官侶鶴猿風俗未寧靜朋黨爭排根引
去良自得濁清在澄源往者未可招冠蓋方駿奔

劉革老

革老奮徒步首與冠國賓儼然自約束被服韞與紳黽
勉丞相府接迹興臺臣顧嫌任安躁未忍裂坐茵推置
冠獬豸謂言我比鄰三晉固多士骯髒存斯人竄責不
敢辭狂言見天真南方異風俗強食魚尾革應同賈太
傅抱屈恥自陳猶有痛哭書受釐定何晨

甘露寺

并引

欲遊甘露寺有二客相過遂與偕行寺有石如羊

相傳謂之很石云諸葛孔明坐其上與孫仲謀論
曹公也大鐵鑊二案銘梁武帝所鑄畫獅子一菩
薩二陸探微筆李衛公所留祠堂在寺手植柏合
抱矣近寺僧發古殿基得舍利七粒并石記乃衛
公為穆宗皇帝造福所葬者也

江上豈不好獨遊情易闌但有相攜人何必素所歡我
欲訪甘露當途無閒官二子舊不識欣然肯聯鞍古郡
山為城層梯轉朱欄樓臺斷崖上地窄天水寬一覽吞

數州山長江漫漫却望大明寺惟見煙中竿很石臥庭
下穹隆如伏獬緬懷臥龍公挾策事瑯鑽一談收獬子
再說走老瞞名高有餘想事往無留觀蕭公古鐵鑊相
對空團團坡陀受百斛積雨生微瀾泗水逸周鼎渭城
辭漢盤山川失故態怪此能獨完僧繇六化人霓衣挂
冰紈隱見十二疊觀者疑夸謾破板陸生畫青猊戲盤
跚上有二天人揮手如翔鸞筆墨雖欲盡典刑垂不刊
赫赫贊皇公英姿凜以寒古柏親手種挺然誰敢干枝

撐雲峰裂根入石窟蟠薤草得斷碑斬崖出金棺瘞藏
豈不牢見伏理可歎四雄皆龍虎遺迹儼未刊方其盛
壯時爭奪肯少安廢興屬造物遷逝誰控搏況彼妄庸
子而欲事所難古今共一軌後世徒辛酸聊興廣武歎
不待雍門彈

樂城次韻

去國日已遠涉江歲將闌東南富山水跬步留清歡遷
延廢行邁忽忘身在官清晨陟甘露乘高棄征鞍超然

脫關闌穿雲撫朱欄下視萬物微惟覺滄海寬潮來勢
洶洶望極空漫漫一一渡海舶冉冉移檣竿水怪時出
沒羣嬉類猓獮幽陰自生火青熒復誰鑽石頭古天險
憑恃分權瞞疑城曜遠目來騎驚新觀聚散定王業成
毀猶月團金山百圍石岌岌隨濤瀾猶疑漢宮廷屹立
承露盤狂波恣吞噬萬古嗟獨完凝眸厭滉漾逸屋行
盤跚此寺歷今古遺迹皆龍鸞孔明所坐石狎羶非人
刊經霜衆草短積雨青苔寒蕭翁嗜佛法大福將力干

坡陀故鑊在甲錯蒼龍蟠衛公秉節制佛骨埋金棺長
松看百尺畫像留三歎新詩語何麗傳讀紙遂刊嗟我
本漁釣江湖心所安方為籠中閑仰羨天際搏遊觀惜
不與賦詠嗟獨難俸祿藉升斗齏鹽嗜鹹酸何時扁舟
去不俟官長彈

初到杭州寄子由二絕

眼看時事力難勝貪戀君恩退未能遲鈍終須投劾去
使君何日換聾丞

聖明寬大許全身衰病摧頽自畏人莫上岡頭苦相望
吾方祭竈請比鄰

樂城次韻

吏治區區豈不勝吳中已自富才能還應占位書名姓
學取藍田崔縣丞

試盡風波萬里身到官山水却宜人君知晏子思仍厚
還與從來舊卜鄰

臘日遊孤山訪惠勤惠思二僧

天欲雪雲滿湖樓臺明滅山有無水清石出魚可數林
深無人鳥相呼臘日不歸對妻孥名尋道人實自娛道
人之居在何許實雲山前路盤紆孤山孤絕誰肯廬道
人有道山不孤紙窓竹屋深自暖擁褐坐睡依團蒲天
寒路遠愁僕夫整駕催歸及未晡出山迴望雲木合但
見野鶻盤浮圖茲遊淡泊歡有餘到家恍如夢遽遽作
詩火急追亡逋清景一失後難摹

李杞寺丞見和前篇復用原韻答之

獸在藪魚在湖一入池檻歸期無誤隨弓旌落塵土坐

使鞭箠環呻呼追胥連保罪及孥

近屢獲鹽賊皆坐同保徒其家

百日

愁嘆一日娛白雲舊有終老約朱綬豈合山人紆人生

何者非遽廬故山鶴怨秋猿孤何時自駕鹿車去掃除

白髮煩菖蒲麻鞋短後隨獵夫射弋狐兔供朝晡陶潛

自作五柳傳潘閔畫入三峯圖吾年凜凜今歲餘知非

不去慚衛遽歲荒無術歸亡逋鵠則易畫虎難摹

再次韻

東望海西望湖山平水遠細欲無野人疎狂逐漁釣刺
史寬大容歌呼君恩飽煖及爾孥才者不閒拙者娛穿
巖度嶺脚力健未厭山水相縈紆三百六十古精廬出
遊無伴籃輿孤作詩雖未造藩閫破悶豈不賢撈蒲君
才敏贍兼百夫朝作千篇日未晡竭來湖上得佳句從
此不看營丘圖知君篋積富有餘莫惜錦繡償管遂窮
多鬪嶮誰先逋賭取名畫不用摹

遊靈隱寺得來詩復用前韻

君不見錢塘湖錢王壯觀今已無屋堆黃金斗量珠運
盡不勞折簡呼四方宦遊散其孥宮闕留與閒人娛盛
衰哀樂兩須臾何用多憂心鬱紆溪山處處皆可廬最
愛靈隱飛來孤喬松百丈蒼髯鬚擾擾下笑柳與蒲高
堂會食羅千夫撞鐘擊鼓喧朝晡凝香方丈眠氍毹絕
勝絮被縫海圖清風時來驚睡餘遂超羲皇傲几蘧歸
時棲鴉正畢逋孤烟落日不可摹

樂城次韻

鳥依山魚依湖但有所無所無輕舟沿沂窮遠近肩
輿上下更傳呼翩然獨往不攜孥兼擅魚鳥兩所娛困
依岩石坐巉絕行牽翠蔓隨纏紆道逢勤思訪其廬誦
詩清切秋蟬孤隱居羞踏陌上土何人起愛輪下蒲水
南巷中羅百夫雞鳴朝謁至日晡人生變化安可料憐
汝久適終無圖鳬鷺不足鶴有餘一俯一仰戚與遽嗟
我久欲從逃遁方圓不敢左右摹

戲子由

宛丘先生長如丘宛丘學舍小如舟常時低頭誦經史
忽然欠伸屋打頭斜風吹帷雨注面先生不愧傍人羞
任從飽死笑方朔肯為雨立求秦優眼前勃溪何足道
處置六鑿須天遊讀書萬卷不讀律致君堯舜知無術
勸農冠蓋鬧如雲送老薤鹽甘似蜜門前萬事不掛眼
頭雖長低氣不屈餘杭別駕無功勞畫堂五丈容旂旄
重樓跨空雨聲遠屋多人少風騷騷平生所慚今不恥
坐對疲氓更鞭箠道逢陽虎呼與言心知其非口諾唯

居高志下真何益
氣節消縮今無幾
文章小技安足程
先生別駕舊齊名
如今衰老俱無用
付與時人分重輕

樂城次韻

我將西歸老故丘
長江欲濟無行舟
宦遊已如馬受輓
衰病擬學龜藏頭
三年學舍百不與
靡費廩粟常慚羞
矯時自信力不足
從政敢謂學已優
閉門却掃誰與語
晝夢時作釣天遊
自從四方多法律
深山更深逃無術
衆人奔走我獨閒
何異端居割蜂蜜
懷安已久心自知

彈劾未至理先屈餘杭軍府百事勞經年未見持干旄
賈生作傳無封事屈平憂世多離騷煩刑弊法非公恥
怒馬奔車忌鞭箠藐藐何自聰諄諄諤諤未必賢唯唯
求田問舍古所非荒畦敝宅今餘幾出從王事當有程
去須燔肉嫌無名掃除百憂惟有酒未退聊取身心輕
六月二十七日望湖樓醉書五絕

黑雲翻墨未遮山白雨跳珠亂入船捲地風來忽吹散
望湖樓下水如天

放生魚鼈逐人來無主荷花到處開
水枕能令山俯仰風船解與月徘徊

烏菱白芡不論錢亂繫青菰裏綠盤
忽憶嘗新會靈觀滯留江海得加餐

獻花遊女木蘭橈細雨斜風濕翠翹
無限芳洲生杜若吳兒不識楚詞招

未成小隱聊中隱可得常閒勝暫閒
我本無家更安往故鄉無此好湖山

樂城次韻

欲看西湖兩岸山
臥乘湖上木蘭船
湖山已自隨船改
更值陰晴欲雨天

眼看西湖不斲來
簿書無算撥還開
三年屈指渾將盡
記取從今得幾回

湖山欲買恨無錢
且盡芳樽對玉盤
菱角雞頭應已厭
蟹螯馬頰更勤餐

終日清漪弄短橈
久忘車乘走翹翹
秋風且食鱸魚美

洛下諸生未可招

滯留朝市常嫌鬧
放棄江湖也未閒
孤舫粗窮千頃浪
肩輿未盡百重山

宿餘杭法喜寺寺後綠野堂望吳興諸山懷孫莘
老學士

徙倚秋原上
淒涼晚照中
水流天不盡
人遠思何窮
問

課知秦過看山識禹功

餘杭始皇所舍舟也西北舟枕山堯時洪水繫舟山上


稻

涼初吠蛤柳老半書蟲
荷背風翻白蓮腮
雨退紅追遊

慰遲暮覓句效兒童北望苔溪轉遙憐震澤通烹魚得
尺素好在紫髯翁

樂城次韻

信美非吾土三吳一水中亭高望已極舟入去無窮朝
市知安在湖山信有功遨遊逐鳬鴨飲食數魚蟲波浪
喧潮汐梅蒸變綠紅逢人問京洛去國長兒童同舍情
相接鄰邦信屢通相邀欲相過道里訊溪翁



坡門酬唱集卷三

欽定四庫全書

集部

坡門酬唱集卷
四至

詳校官中書_臣張經田

助教_臣常循覆勘

總校官庶吉士_臣朱 鈔

校對官中書_臣李 紱

謄錄監生_臣李文杞

欽定四庫全書

坡門酬唱集卷四

宋 邵浩 編

東坡

遊徑山

衆峰來自天目山勢如駿馬奔平川
中途勒破千里足金鞭玉轡相回旋
人言山住水亦住下有萬古蛟龍淵
道人天眼識王氣結茆宴坐荒山巔
精誠貫山石為裂

天女下試顏如蓮寒窓暖足來朴朔夜鉢呪水降蜿蜒
雪眉老人朝叩門願為弟子長參禪邇來廢興三百載
奔走吳會輸金錢飛樓湧殿壓山破朝鐘暮鼓驚龍眠
晴空偶見浮海蜃落日下數投村鳶有生共處覆載內
擾擾膏火同烹煎近來愈覺世議隘每到寬處差安便
嗟余老矣百事廢却尋舊學心茫然問龍乞水歸洗眼
欲看細字銷殘年

龍井水洗
病眼有效

樂城次韻

去年度江愛吳山忽忘蜀道輕秦川錢塘後到山最勝
下枕湖水相縈旋坐疑吳會無復有扁舟屢出凌濤淵
今秋復入徑山寺勢壓衆嶺皆摧顛連峯沓嶂不知數
重重相抱如青蓮散為雲霧翳星斗聚作潭井藏蜿蜒
欽翁未到人迹絕千里受記來安禪荒榛野草置茅屋
坐令海賈輸金錢至今傳法破煩惱飽食過客客安眠
解裝投錫不復去紛紛四合來烏鳶或言此處猶未好
海上人少無煩煎天台雁蕩最深秀水驚石瘦尤清便

青山獨往無不可論說好醜徒紛然終當直去無遠近
藤鞋竹杖聊窮年

自徑山回得呂察推詩用其韻招之宿湖上

呂名仲甫

字穆仲丞相文
穆公蒙正孫

多君貴公子愛山如愛色心隨葉舟去夢遠千山碧新
詩到中路令我喜折屐古來軒冕徒操捨兩悲慄數朝
辭簪笏兩脚得暫赤歸來不入府却走湖上宅寵辱吾
久忘寧畏官長詰飄然便歸去誰在子思側君能從我

遊出郭及未黑

宿望湖樓再和

新月如佳人出海初弄色娟娟到湖上
潏潏搖空碧夜涼人未寢山靜聞響屐
騷人故多感悲秋更慄慄君胡不相就
朱墨紛黜赤我行得所嗜十日忘家宅
但恨無友生詩病莫訶詰君來試吟咏
定作鶴頭側改罷心愈疑滿紙蛟蛇黑

樂城次韻

朝從徑山來決莽徑山色莫從湖上歸滉漾湖光碧借
問泛湖舟何似登山屐高懷厭朝市遠去忘憂慄日向
幽人青顏從濁醪赤塵埃解羅網宇宙為安宅油然了
無營此意誰能詰嗟予別離久欲往徒反側留滯亦何
為空驚突深黑

孫莘老求墨妙亭詩

先生墨妙亭記云熙寧四年十二月高郵縣孫莘老自廣

德移守吳興明年二月作墨妙亭於府第之北取自漢以來古文遺刻以實之

蘭亭重紙入昭陵世間遺迹猶龍騰顏公變法出新意

細筋入骨如秋鷹徐家父子亦秀絕字外出力中藏稜
嶧山傳刻典刑在千載筆法留陽冰杜陵評書貴瘦硬
此論未公吾不憑短長肥瘦各有態玉環飛燕誰敢憎
吳興太守真好古購買斷缺揮鱣繒龜跌入坐螭隱壁
空齋畫靜聞登登竒蹤散出走吳越勝事傳說誇友朋
書來乞詩要自寫為把栗尾書谿藤後來視今猶視昔
過眼百世如風燈他年劉郎憶賀監還道同時須服膺

樂城次韻

高岸為谷谷為陵一時豪傑空飛騰身隨造化不復返
忽若野雀逢蒼鷹當年碑刻最深固風吹土蝕消無稜
遺文漫滅雨中迹翠石斷裂春後冰古墳欲毀野廟廢
行人不去征鞍憑書生耽翫立風雪飢驢厭苦疲奴憎
愛之欲取恨無力旋揉翠墨濡黃繒不如好事孫太守
牛車徙置華堂登遠牆羅列耀珪璧罷燕起讀留賓朋
却思遺迹本安在原隰處處荒榛藤田夫老誰復顧
鬼火夜照來寒燈廢興聚散一如此反使涕泗沾人膺

望海樓晚景五絕

樓在杭州舊治中和堂北太平
寰宇記樓高十八丈唐武德七

年始
置

海上濤頭一線來
樓前指顧雪成堆
從今潮上君須上
更看銀山二十回

橫風吹雨入樓斜
壯觀應須好句誇
雨過潮平江海碧
電光時掣紫金蛇

青山斷處塔層層
隔岸人烟喚欲應
江上秋風晚來急
為傳鐘鼓到西興

樓下誰家燒夜香
玉笙哀怨弄初涼
臨風有客吟秋扇
拜月無人見晚粧

沙河燈火照山紅
歌鼓喧呼語笑中
為問少年心在否
角巾歌側鬢如蓬

八月十七日復登望海樓
自和前篇是日榜出余
與試官兩人復留五首

樓上煙雲怪不來
樓前飛紙落成堆
非關文字須重看
却被江山未放回

眼前燭暗細行斜
考閱精強外已誇
明日失杯君莫怪
早知安足不成蛇

亂山遮曉擁千層
睡美初涼撼不應
昨夜酒行君屢歎
定知歸夢到吳興

天台桂子為誰香
倦聽空階夜點涼
賴有明朝看潮在
萬人空巷鬪新粧

秋花不見眼花紅
身在孤舟兀兀中
細雨作寒知有意
未教金菊出蒿蓬

樂城次韻

山色潮聲四面來
城中金碧爛成堆
不愁門外嚴扃鎖
終日憑欄未擬回

湖色蒼蒼日向斜
煙波萬狀不容誇
畫船人去浮紅葉
石徑僧歸躡白蛇

樓觀爭高不計層
嗷嗷過鴈自相應
錢王舊業依稀在
歲久無人話廢興

荷葉初乾稻穗香
驚雷急雨送微涼
晚晴稍放秋山色

洗却濃粧作淡粧

白酒傾漿膾斫紅畫遊未厭月明中樓高只辦聽歌鼓
不見遊人轉似蓬

八月十日夜看月有懷子由并崔度賢良

宛丘先生自不飽更笑老崔窮百巧一更相過三更歸
古柏陰中看參昴去年舉君苜蓿盤夜傾閩酒赤如丹
今年還看去年月露冷遙知范叔寒典衣自種一頃豆
那知積雨生科斗歸來四壁艸蟲鳴不如王江長飲酒

王江陳
州道人

樂城次韻

先師客陳未嘗飽弟子於今敢言巧敗墻破屋秋雨多
夜視陰晴過畢昂齋鹽冷落空盃盤且依道士修還丹
丹田發火五臟暖未補漫漫長夜寒我生疲駑戀莖豆
崔翁遊邊指北斗唯有王江亦未歸閉門無客邀沽酒

宛丘道人王江好飲酒
去冬遊沈丘遂不歸

是日宿水陸寺寄北山清順僧二首

草沒河堤雨暗村寺藏脩竹不知門
拾薪煮藥憐僧病
掃地焚香淨客魂農事未休侵小雪
佛燈初上報黃昏
年來漸識幽居味思與高人對榻論

長嫌鐘鼓聒湖山此境蕭條却自然
乞食遶村真為飽
無言對客本非禪披榛覓路衝泥入
洗足關門聽雨眠
遙想後身窮賈島夜寒應聳作詩肩

樂城次韻

雲氣連山雨瀉盆莫投僧舍欲關門
暫時洒掃寬行役

終久崎嶇入夢魂
煩熱暗消秋簟冷
蒸濡未解夜燈昏
二年遊宦多勞苦
何日相從得細論

野寺蕭條厭客喧
雨披脩竹亂紛然
已因無食聊從仕
深悟勞生不問禪
未至莫憂明日事
偷閒且就此宵眠
天明歸去芒鞋滑
雖有藤輿懶上肩

將之湖州戲贈莘老

餘杭自是山水窟
側聞吳興更清絕
湖中橘林新著霜
溪上苔花正浮雪
顧渚茶芽白於齒
梅溪水爪紅勝頰

吳兒膾縷薄欲飛未去先說饒涎垂亦知謝公到郡久
應怪杜牧尋春遲鬢絲只好對禪榻湖亭不用張水嬉

再用前韻寄莘老

君不見夷甫開三窟不如長康號癡絕癡人自得終天
年智士死智罪莫雪困窮誰要卿料理舉頭看山笏拄
頰野鳬翅重自不飛黃鶴何事兩翼垂泥中相從豈得
久今我不往行恐遲江夏無雙應未去恨無文字相娛

嬉

黃庭堅莘
老壻能文

樂城次韻

宦遊莫向長城窟冬冰折膠弦亦絕吳中臘月百事便
蟹煮黃金鱸膾雪京城舊友一分散近憶吳興須滿頰
世事反覆如翻飛今日共鯨前益垂畏人但恐去不遠
適意未覺歸來遲借問校讎天祿閣何如江海同遊嬉

吳中田婦嘆

一本有和賈
收韻四字

今年粳稻熟苦遲庶見霜風來幾時霜風來時雨如瀉
把頭出茵鎌生衣眼枯淚盡雨不盡忍見黃穗臥青泥

茆苦一月隴上宿天晴獲稻隨車歸汗流肩頰載入市
價賤乞與如糠粃賣牛納稅折屋炊慮淺不及明年飢
官今要錢不要米西北萬里招羌兒龔黃滿朝人更苦
不如却作河伯婦

樂城次韻

久雨得晴惟恐遲既晴求雨來何時今年舟楫委平地
去年簑笠為裳衣不知天公誰怨怒棄置下土塵與泥
丈夫強健四方走婦女齷齪將安歸塌然四壁倚機杼

收拾遺粒吹糠粃東鄰十日營一炊西鄰誰使救汝飢
海邊惟有鹽不旱賣鹽連坐收嬰兒傳聞四方同此苦
不關東海誅孝婦

遊道場山何山

道場山頂何山麓上徹雲峰下幽谷我從山水窟中來
尚愛此山看不足陂湖行盡白漫漫青山忽作龍蛇盤
山高無風松自響誤認石齒號驚湍山僧不放山泉出
屋底清池照瑤席堦前合抱香入雲月裏仙人親手植

出山回望翠雲鬟
碧瓦朱欄縹緲間
白水田頭問行路
小溪深處是何山
高人讀書夜達旦
至今山鶴鳴夜半
我今廢學不歸山
山中對酒空三嘆

樂城次韻

兩山相負為峰麓
流水重重注溪谷
遊人上尋流水源
未覺崎嶇病雙足
山深下視雲漫漫
徑垂石底千屈盤
松林陰森白日靜
忽驚人世如奔湍
客行不避苦寒出
僧定端居不下席
人生嗟與草木同
置身所在由初植

堂中白佛青髻鬢氣象冲淡非人間坐令遠客厭奔走
徑欲築室依空山木魚根根夜將旦星斗欹斜掛山半
行役有程未可留將出山門復長嘆

新城道中二首

東風知我欲山行吹斷簷間積雨聲嶺上晴雲披絮帽
樹頭初日掛銅鉦野桃含笑竹籬短溪柳自搖沙水清
西崦人家應最樂煮葵燒筍餉春耕

身世悠悠我此行溪邊委轡聽溪聲散材畏見搜林斧

疲馬思聞卷旆鉦細雨足時茶戶喜亂山深處長官清
人間岐路知多少試向桑田問耦耕

樂城次韻一首

春深溪路少人行時聽田間耒耜聲飢就野農分餉黍
迎嫌尉卒鬧金鉦閒花開盡香仍在白酒沽來壓未清
此味暫時猶覺勝問凡何日便歸耕

山村五絕

竹籬茆屋趁溪斜春入山村處處花無象太平還有象

金定四庫全書
卷四
孤煙起處是人家

煙雨濛濛雞犬聲有生何處不安生但教黃犢無人佩
布穀何勞也勸耕

老翁七十自腰鑣慙愧春山筍蕨甜豈是聞韶解忘味
爾來三月食無鹽

杖藜裹飯去匆匆過眼青錢轉手空贏得兒童語音好
一年強半在城中

竊祿忘歸我自羞豐年底事汝憂愁不須更待飛鳶墮

方念平生馬少遊

樂城次韻

山行喜遇酒旗斜無限桃花續杏花與世浮沉真避世
將家漂蕩似無家

塍間白水細無聲日暖泥融草不生似恐田家忘帝力
多差使者出催耕

旋春紅稻始經鎌新煮黃雞取次甜無慕無營人自樂
莫將西子愧無鹽

升平事業苦匆匆未信浮名到底空何用橐駝朝塞外
試聽碌軸語場中

貧賤終身未要羞山林難處便堪愁近來南海波尤惡
未許乘桴自在遊

獨遊富陽普照寺

富春真古邑此寺亦唐餘鶴老依喬木龍歸護賜書連
筒春水遠出谷晚鐘疎欲繼江潮韻何人為起予

樂城次韻

塵埃日已遠斗擲更無餘寺到逢門入詩成信手書山
深僧自樂路遠故人疎訪盡前朝景它年一告予

自普照遊二庵

長松吟風晚雨細東庵半掩西庵閉山行盡日不逢人
裊裊野梅香入袂居僧笑我戀清景自厭山深出無計
我雖愛山亦自笑獨往神傷後難繼不如西湖飲美酒
紅杏碧桃香覆髻作詩寄謝採薇翁本不避人那避世

樂城次韻

披榛入山山路細鐘聲出寺門將閉石苔冉冉上芒鞋
草露溥溥著衣袂野人茅茨苦竹屋終身局促無生計
天公未爾長困人春田米盡秋田繼老妻稚子亦自樂
野草山花還插髻長笑人間醉未醒終老辛勤漫欺世

與臨安令宗人同年劇飲

我雖不解飲把盞歡意足試呼白髮感秋人令唱黃雞
催曉曲與君登科如隔晨敝袍霜葉空殘綠如今莫問
老與少兒子森森如立竹黃雞催曉不須愁老盡世人

非我獨

樂城次韻

晚歲事遊宦相從未嘗足羨君四海皆兄弟棧中直木
不容曲臨安老令況同科相逢豈厭樽中綠潦倒誰憐
澗底松歲寒尚有霜前竹聞道渠家八丈夫它日歸耕
免幽獨

癸丑春分後雪

雪入春分省見稀半開桃李不勝威應慚落地梅花識

却作漫天柳絮飛不分東君專節物故將新巧發陰機
從今造物尤難料更暖須留御臘衣

樂城次韻

春雪漫天密又稀勾芒失據走靈威故欺貧窶冬裘盡
巧助遨遊酒盞飛林下細花添百草堦前輕素剪新機
老農先解憂桑柘九月家人當授衣

坡門酬唱集卷四